

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**MIŠLJENJE**

**po zahtjevu privrednog subjekta Mješoviti Holding Elektroprivreda Republike Srpske Matično  
preduzeće a.d Trebinje u vezi obaveze podnošenja prijave koncentracije**

**Sarajevo,  
oktobar 2012. godine**



Broj: 01-26-7-12-1-I/12  
Sarajevo, 30.10.2012. godine

Na osnovu člana 25. stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po Zahtjevu za davanje mišljenja privrednog subjekta Mješoviti Holding Elektroprivreda Republike Srpske Matično preduzeće a.d Trebinje, Stepe Stepanovića bb, 89101 Trebinje, zastupanog po generalnom direktoru Branislavi Milekić, zaprimljenog od strane Konkurencijskog vijeća dana 27.09.2012. godine pod brojem: 01-26-7-12-I/12, Konkurencijsko vijeće, na 44. sjednici održanoj dana 30.10.2012. godine, donijelo je

### MIŠLJENJE

Privredni subjekt Mješoviti Holding Elektroprivreda Republike Srpske Matično preduzeće a.d Trebinje, Stepe Stepanovića bb, 89101 Trebinje (u daljem tekstu: Podnosilac zahtjeva), podnio je Konkurencijskom vijeću Zahtjev za davanje mišljenja (u daljem tekstu: Zahtjev), zaprimljen dana 27.09.2012. godine pod brojem: 01-26-7-12-I/12.

Podnosilac zahtjeva traži mišljenje od Konkurencijskog vijeću o obavezi podnošenja prijave koncentracije u vezi sa namjeravanim zaključenjem Ugovora o strateškom partnerstvu u istraživanju, razvoju, izgradnji i korištenju hidroenergetskog potencijala gornjeg sliva rijeke Drine (u daljem tekstu: Ugovor), a koji namjeravaju zaključiti Republika Srpska - Vlada Republike Srpske (u daljem tekstu: Vlada), Mješoviti Holding Elektroprivreda Republike Srpske Matično preduzeće a.d Trebinje (u daljem tekstu: ERS) i kompanija RWE Innogy GmbH (u daljem tekstu: RWE), društvo sa ograničenom odgovornošću, sa sjedištem u Gildehofstrasse 1, Esen, Njemačka.

Podnosilac Zahtjeva u bitnom navodi slijedeće:

- Vlada je utvrdila javni interes za neposrednu dodjelu koncesije za istraživanje, izgradnju, korištenje i prijenos u svojini Koncedenta, nakon isteka koncesionog perioda, energetskih objekata na gornjem slivu rijeke Drine;
- Vlada je donijela Odluku o uslovima, kriterijumima i načinu izbora strateškog partnera za projekat hidroenergetski sistem Gornja Drina br. 04/1-012-2-827/11 od 20.04.2011. godine i uputila javni poziv svim zainteresiranim kandidatima, nakon čega je donijela odluku o izboru kompanije RWE kao strateškog partnera, uz odložni uslov da to treba potvrditi i Narodna skupština Republike Srpske;
- U članu 27(a) Zakona o koncesijama ("Službeni glasnik RS", br. 25/02, 91/06 i 92/09) navedeno je da se koncesija za istraživanje, izgradnju i korištenje objekata za obavljanje djelatnosti od općeg interesa u oblasti energetike, može dodijeliti zajedničkom koncesionom privrednom društvu za obavljanje djelatnosti koja je predmet koncesije, osnovanom od strane strateškog partnera i javnog preduzeća u energetskoj djelatnosti (ERS);
- Vlada, ERS i RWE namjeravaju da u Ugovor postave osnovne principe saradnje u elektroenergetskom sektoru Republike Srpske u pogledu predmetnog projekta;
- Svrha Ugovora je da se regulišu uslovi implementacije projekta, uključujući odnos ugovornih strana tokom (1) faze istraživanja, koja uključuje osnivanje projektnog društva i dodjeljivanje četiri koncesije za istraživanje (jednu za svaki zaseban projekat) projektnom društvu, (2) fazu razvoja koja uključuje osnivanje četiri koncesiona društva i dodjeljivanje koncesija za izgradnju i korištenje

Koncesionim društvima za svaki zaseban projekat, kao i razvijanje projekta do faze kada su sva koncesiona društva usvojila konačnu investicionu odluku, (3) sukcesivna izgradnja hidroelektrana u vezi sa kojima je usvojena pozitivna konačna investiciona odluka, (4) rad hidroelektrana tokom koncesionog perioda, kao i dalje aktivnosti ugovornih strana koje su neophodne za uspješnu implementaciju projekta;

- Svaha uspostavljanja strateškog partnerstva je procjena opravdanosti i ulaganje najvećih napora kako bi se realiziralo istraživanje, razvoj, izgradnja i korištenje projekata hidroelektrana: Buk Bijela, Paunci, Sutjeska i Foča, te dodjelu potrebnih koncesija projektnom društvu i relevantnim koncesionim društvima po sistemu BOT (Build-Operate-Transfer) i na profitabilnoj osnovi.

Članom 12. stav (1) tačka c) Zakona o konkurenciji propisano je da se koncentracijom privrednih subjekata smatra zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt.

Članom 14. stav (1) tačka a) i b) Zakona o konkurenciji, propisano je da su privredni subjekti namjeravanu koncentraciju, iz člana 12. stav (1) istog Zakona, obavezni prijaviti ukoliko su ispunjena dva uslova. U članu 14. stav (1) tačka a) navodi se prvi uslov, da ukupni godišnji prihod svih učesnika koncentracije ostvaren prodajom roba i/ili usluga na svjetskom tržištu iznosi 100 miliona KM, po završnom računu u godini koja je prethodila koncentraciji, a u članu 14. stav (1) tačka b) drugi uslov, da ukupan prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8 miliona KM, ili ako je zajedničko tržišno učešće učesnika koncentracije na relevantnom tržištu veće od 40%.

Član 2. Odluke o načinu podnošenja prijave i kriterijumima za ocjenu koncentracija privrednih subjekata ("Službeni glasnik BiH", br. 34/10) daje pojašnjenje propisanih uslova za obavezu podnošenja prijave koncentracije, pa su koncentraciju dužni prijaviti privredni subjekti sa sjedištem i prebivalištem u inostranstvu ukoliko su zajedno ispunjena oba uslova iz člana 14. stav (1) tačka a) i b) Zakona o konkurenciji, odnosno privredni subjekti sa sjedištem i prebivalištem u Bosni i Hercegovini ukoliko su ispunjeni samo uslovi iz člana 14. stav (1) tačka b) Zakona o konkurenciji.

Članom 16. stav (1) Zakona o konkurenciji, propisano je da su privredni subjekti, učesnici koncentracije obavezni podnijeti prijavu koncentracije u smislu člana 12. i 14. istog Zakona, u roku od 15 dana od dana zaključivanja sporazuma, objavljivanja javne ponude dionica ili sticanja kontrole, zavisno od toga šta nastupi prije.

Prema podacima kojima raspolaže Konkurencijsko vijeće, privredni subjekt RWE je u 2011. godini na svjetskom tržištu ostvario prihod od (..)\*\*<sup>1</sup> KM, a na tržištu Bosne i Hercegovine prihod od (..)\*\* KM, dok je privredni subjekt ERS u 2011. godini na svjetskom tržištu ostvario prihod od (..)\*\* KM, a na tržištu Bosne i Hercegovine prihod od (..)\*\* KM.

U skladu sa izloženim, Konkurencijsko vijeće smatra da se u predmetnom slučaju radi o koncentraciji privrednih subjekata shodno članu 12. stav (1) tačka c) Zakona o konkurenciji i da postoji obaveza podnošenja prijave koncentracije, s obzirom da privredni subjekti ispunjavaju uslov godišnjeg prihoda ostvarenog na svjetskom tržištu i tržištu Bosne i Hercegovine prodajom roba i /ili usluga u 2011. godini, u smislu člana 14. stav 1) tačka a) i b) Zakona o konkurenciji.

Ovo mišljenje je dato isključivo na osnovu podataka navedenih u Zahtjevu i Prijavi, te ukoliko dati podaci odstupaju od stvarnog činjeničnog stanja ovo mišljenje se ne može primijeniti.

Predsjednica

Gordana Živković

---

<sup>1</sup> (..)\*\* podaci predstavljaju poslovnu tajnu